



Republika e Kosovës
Republika Kosova-Republic of Kosovo
Kuvendi - Skupština - Assembly

Legjislatura III
Sesioni vjeshtor

Seancë plenare e Kuvendit

P- 036

Prishtinë, më 19 shtator 2008, në orën 10:00

Ndërtesa e Kuvendit, salla e seancave plenare.

PROCESVERBAL

**I SEANCËS PLENARE TË KUVENDIT TË REPUBLIKËS SË KOSOVËS, TË MBAJTUR
MË 19 SHTATOR 2008**

Seancën e kryesoi **Jakup Krasniqi**, Kryetar i Kuvendit, kurse i ndihmoi **Sabri Hamiti**, anëtar i Kryesisë.

Kryetari konstatoi se në seancë janë të pranishëm 97 deputetë dhe e deklaroi të hapur punën e saj.

Kryetari i njoftoi deputetët se Kryesia e Kuvendit, në marrëveshje me grupet parlamentare, në pajtim me rregullat 6.2 dhe 23 të Rregullores së Punës së Kuvendit, ka përgatitur dhe Kuvendit ia ka paraqitur rendin e ditës për seancën e sotme plenare.

Lidhur me rendin e ditës, kryetari i Grupit parlamentar të PDK-se z. Ramë Buja propozoj që Shqyrtimi i Raportit të Radio Televizionit të Kosovës për vitin 2007 të shtyhet derisa deputetët të marrin edhe Raportin e Auditorit të përgjithshëm të Kosovës për RTK-në për vitin 2007.

Pas deklarimit të kryetarëve të grupeve parlamentare, Kryetari hodhi propozimin në votim. Rezultati i votimit ishte si vijon:

Për---- shumica absolute;
Kundër-----5,
Abstenime-----3..

Kryetari konstatoj se me shumicën e votave të deputetëve, hiqet nga rendi i ditës Shqyrtimi i Raportit të Radio Televizionit të Kosovës për vitin 2007 derisa deputeteve t'iu sigurohet edhe Raporti i Auditorit të Përgjithshëm të Kosovës për auditimin e RTK-se për vitin 2007 .

Ne vazhdim të diskutimit për rendin e ditës, kryetari tha se në rendin e ditës nuk i kemi parapare pyetjet parlamentare, prandaj sipas rregullave, duhet të votojmë, a jemi ne për atë pikë të rendit të ditës?

Kryetari hodhi propozimin në votim. Rezultati i votimit ishte si vijon:

Për---shumica absolute;
Kundër-----3,
Abstenime-----1.

Kryetari konstatoj se me shumicën e votave të deputetëve, miratohet propozimi që pika e parë në rend dite për sot, të jete Koha për pyetjet parlamentare.

Kuvendi i zhvilloi punimet me këtë

R e n d i t e:

1. Koha për pyetje parlamentare,
2. Shqyrtimi i Raportit të Këshillit të Pavarur të Mediave për vitin 2007 (raporti iu është dërguar deputetëve më 06.03.2008).
3. Shqyrtimi i Raportit për shpenzimet e Buxhetit të Kosovës për gjashtëmuorin e parë të vitit 2008 (raporti iu është dërguar deputetëve më 04.08.2008),

1. Koha për pyetje parlamentare

Deputetja **Myrvete Pantina**, pyetje për ministrin e Punës dhe të Mirëqenies Sociale, **Nenad Rashiqin**.

Deputeti **Driton Tali**, pyetje për ministrin e Arsimit, të Shkencës dhe të Teknologjisë, zotin **Enver Hoxhaj**.

Deputeti **Riza Smaka**, pyetje për ministrin e Arsimit, të Shkencës dhe të Teknologjisë, zotin **Enver Hoxhaj**.

Deputeti **Riza Smaka**, pyetje për ministrin e Punës dhe të Mirëqenies Sociale, zotin **Nenad Rashiq**.

Deputetja **Drita Maliqi**, pyetje për ministrin e Administrimit të Pushtetit Lokal, zotin **Sadri Ferati**.

Deputeti **Driton Tali**, pyetje për ministrin Punëve të Brendshme, zotin **Zenun Pajaziti**

Deputeti **Naim Rrustemi**, pyetje për ministren e Drejtësisë, zonjën **Nekibe Kelmendi**.

Deputeti **Naim Rrustemi**, pyetje për ministrin Punëve të Brendshme, zotin **Zenun Pajaziti**.

Deputeti **Hydajet Hyseni**, pyetje për ministren e Drejtësisë, zonjën **Nekibe Kelmendi**.

Deputeti **Hydajet Hyseni**, pyetje për ministren e Drejtësisë, zonjën **Nekibe Kelmendi**.

Deputeti **Hydajet Hyseni**, pyetje për ministrin e Mjedisit dhe të Planifikimit Hapësinor, zotin **Mahir Yagcilar**.

Deputetja **Gjylnaze Syla**, pyetje për ministrin Shëndetësisë, zotin **Alush Gashi**.

2. Shqyrtimi i Raportit të Këshillit të Pavarur të Mediave për vitin 2007 (raporti iu është dërguar deputetëve më 06.03.2008).

Ne fillim të debatit lidhur me këtë pike, kryetari **Jakup Krasniqi** theksoj se:

Komisioni i Pavarur për Media, në pajtim me Ligjin për Komisionin e Pavarur për Media dhe Transmetim i ka paraqitur Kuvendit Raportin vjetor të punës për vitin 2007.

Komisioni për Shërbime Publike dhe Administratë Lokale dhe Media e ka shqyrtuar Raportin vjetor të Punës së Komisionit të Pavarur për Media për vitin 2007 dhe ka rekomanduar që të radhitet për shqyrtim në seancën plenare.

Po ashtu, edhe Komisioni për Buxhet dhe Financa e ka shqyrtuar Raportin vjetor të punës së Komisionit të Pavarur për Media për vitin 2007 dhe ka rekomanduar që të radhitet për shqyrtim në seancën plenare.

Ne vazhdim kryetari ia dha fjalën kryetarit të komisionit funksional, z. **Esat Brajshori**.

Esat Brajshori: Në emër të Komisionit parlamentar për Media, ne kemi shqyrtuar raportin e KPM-së. Ka pasur kritika të mëdha nga deputetët, kemi kërkuar që të plotësohet nga ato që ne kemi menduar se nuk janë të plota në raport. KPM-ja ka marrë parasysh këtë gjë dhe na ka kthyer pastaj një lloj përgjigje dhe në emër të Komisionit ne kemi marrë vendim që çështja ose raporti i KPM-së për vitin 2007 të procedohet në seancë plenare dhe nga ky debat të nxirret një konkluzion në lidhje me punën e KPM-së për vitin 2007.

Kryetari i Komisionit për Buxhet dhe Financa, z. **Gani Koci**, tha:

Komisioni për Buxhet, në mbledhjen e vet të mbajtur më 11.7.2008, ka shqyrtuar raportin sa i përket pjesës buxhetore. Duhet pasur parasysh se ky Komision ka qenë deri vonë kompetencë e rezervuar dhe tek me Ligj pastaj është institucion që i përgjigjet Kuvendit. Në pjesën financiare të këtij Komisioni, ky iu ka përgjigjur Ligjit për menaxhimin e financave publike lidhur me raportimet financiare dhe standardet ndërkombëtare të kontabilitetit në sektorin publik dhe, si të tillë, Komisioni e ka përkrahur dhe ia ka rekomanduar Kuvendit që ta shqyrtojë. Ajo që është shqetësuese për këtë Komision, me siguri gjatë diskutimeve do të thuhet, në kuptimin e nxjerrjes së rregulloreve mbi tarifat e licencimit dhe të krijimit të një fondi, siç e thotë edhe Ligji, nga këto tarifa ose nga gjobat që mund të mblidhet. Rreth kësaj nuk kemi pasuar një

raport nga ky Komision i Mediave dhe ne, si Komision, kemi kërkuar që vërtet të plotësohet raporti lidhur me këtë çështje.

Qëndrimi i tyre ka qenë se në vitin paraprak ata nuk kanë pasur të hyra nga këto licenca dhe kjo ka qenë arsyeja pse nuk është futur në raportin e buxhetit. Por, vërejtja qëndron se në raportimet e tjera duhet të përfillin në mënyrë të përpiktë Ligjin mbi menaxhimin e financave publike dhe mënyrën e raportimit financiar.

Në emër të Partisë Demokratike diskutoj deputeti **Hajdin Abazi** tha se Grupi Parlamentar i PDK-së e ka lexuar me vëmendje Raportin e KPM-së dhe është një nismë e mirë që ky Komision i drejtohet Kuvendit për të raportuar pasi që tash ka ndryshuar realiteti në Kosovë dhe kësaj duhet të vendoset rendi dhe rregulli.

Mirëpo, duke ditur se këtu është fjala për raportin e veprimtarisë së Komisionit për Media për vitin 2007, ka pasur pengesa të mëdha nga mosfunksionimi i bordit, janë manifestuar jo veprime konkrete dhe azhure në praktikë për të marrë masa ndaj shkelësve të frekuencave, për të ndaluar frekuencat ilegale, për të marrë masa që, për shembull, RTK-ja ta mbulojë gjithë territorin e Kosovës, e mangësitë të këtilla. Mirëpo, këto janë gjëra të cilat kanë ndodhur dhe është një realitet që nuk mund të rikthehet. Tani për sivjet Bordi është i kompletuar dhe Kuvendi duhet të angazhohet që të kërkojë që KPM-ja të jetë më aktive në kryerjen dhe përmbushjen e obligimeve të veta.

Mirëpo, njëherësh është e nevojshme që edhe Ligji përmes të cilit rregullohet veprimtaria, përgjegjësitë, obligimet dhe angazhimet e KPM-së të riprocedohet, të merret në shqyrtim, të bëhen plotësime dhe të bëhet adekuat që ai të mund të funksionojë në mënyrë efikase dhe ta kryej detyrën e vetë si duhet. Ne fund ai tha se me këto vërejtje, Grupi Parlamentar i Partisë Demokratike e Kosovës, do ta mbështesë këtë raport.

Në emër të Grupit Parlamentar të Lidhjes Demokratike, kryetari **Lutfi Haziri**, tha se Grupi Parlamentar i LDK-së mbështet në tërësi Raportin e dorëzuar sot, në veçanti çmon angazhimin e dy komisioneve funksionale të Kuvendit dhe i mbështet rekomandimet e tyre në funksionalizimin dhe në angazhimet apo rekomandimet që i kanë bërë për këtë organ të pavarur.

Në emër të Grupit Parlamentar të AKR-së, deputeti **Esat Brajshori** tha se Grupi Parlamentar i AKR-së, është përpjekur që ta shqyrtojë me dinjitet këtë raport duke pasur parasysh rëndësinë që ka KPM-ja në lidhje me funksionin që duhet të kryejë. Duke pasur edhe unë personalisht të njohur këtë raport edhe nga shqyrtimi që ka bërë Komisioni për Media në mbledhjet e veta, edhe nga gjendja reale në terren, konstatoj se tregu medial në Kosovë është krejtësisht kaotik, po flasim për raportin 2007. Komisioni i Pavarur i mediave që është i thirrur për të vënë rregulla, për të dhënë licenca për transmetuesit, për të vënë në zbatim Ligjin mbi KPM-në, nuk ka arritur të tregojë kapacitete menaxhuese dhe të jetë i paanshëm. Është për t'u çuditur se si ka funksionuar KPM-ja sa i përket strukturimit të brendshëm kadrovik. As edhe një herë, që prej themelimit të këtij Komisioni nuk janë plotësuar të gjitha vendet drejtuese të këtij Komisioni. Si rezultat i kësaj, janë nxjerrë disa rregullore të brendshme që shumë nga kompetencat i janë deleguar shefit ekzekutiv të KPM-së. Prandaj, vendimet që janë marrë pastaj, ju mund ta merrni me mend se sa kanë qenë të balancuara, të drejta dhe joselektive.

Ende kanë mbetur pa përgjigje të sakta ose janë dhënë përgjigje të justifikuara, shumë nga pyetjet që i ka shtruar edhe Komisioni për Media në lidhje me funksionimin e KPM-së. Nuk është dhënë përgjigje e saktë se çfarë zgjidhjesh ka ofruar KPM-ja ndaj transmetuesve të cilët kanë pasur probleme me interferencat, përfshirë këtu edhe interferencat që vijnë nga mediat serbe.

Çka ka ndërmarrë KPM-ja ndaj RTK-së, transmetuesit publik, për mos mbulueshmëri të frekuencave në komunat ku jetojnë komunitetet joserbe. Ju e dini se është një pjesë e mirë që RTK-ja nuk e mbulon një hapësirë të mirë të territorit të Kosovës, nëse nuk gabo, diku mbi 12% . Sa ka qenë KPM-ja në koordinim me ART-në në menaxhimin e spektrit të frekuencave konform nenit 2.6 të ligjit në fuqi.

Licencimi i operatorëve kabllorë për të cilën gjë ligji e ka obliguar KPM-në që ta kryej që në vitin 2005, jo që nuk është bërë në të 2005-tën e as në të 2006-tën, por as në të 2007-tën, raportin e të cilit vit po e diskutojmë tani. Operimi pa licencë i kabllorëve për 3 vjet me radhë, po them 3 vjet, që kur e ka obliguar ligji në fuqi, sepse operimi i kabllorëve është edhe më i hershëm, i ka kushtuar buxhetit të Kosovës me qindra mijëra euro.

Ligji në fuqi për mediat thotë se frekuencat duhet të ndahet me korrektësi në aspektin etnik, gjeografik e të tjera. Ndërkaq, edhe pse rreth 20 televizione, sa janë gjithsej në Kosovë, nuk arrijnë që ta mbulojnë sot aksin rrugor Prishtinë - Pejë që nga mbyllja e Radiotelevizionit të Mitrovicës. Të jesh agjencion i pavarur, nuk do të thotë të jesh jashtë planetar, jashtë rregullave dhe jashtë ligjit.

Të gjitha këto defekte të funksionimit të KPM-së në esencë janë rezultat i një ligji jofunksional ekzistues për KPM-në. Është në përgjegjësinë e këtij parlamenti si themelues i Komisionit të Pavarur të Mediave, që t'i fillojë procedurat për amendimin e Ligjit për RTK-në. Kështu, njëherë e mirë do të stabilizohej tregu medial në Kosovë i cili, tani për tani, është akoma në kaos. Si grup Parlamentar, ne përkrahim këtë raport me konkluzionin dhe kërkesën që të fillojë procedura për amendimin e Ligjit për KPM-në.

Në Emër të Grupit Parlamentar të AAK-së, deputeti **Rasim Selmanaj** tha se Komisionin e Pavarur të Mediave vazhdojnë ta përcjellin një mori lëshimesh dhe vështirësish njëkohësisht në punë. Në KPM, siç u tha edhe nga kryetari i Komisionit, vërehet jo transparenca në funksionimin e brendshëm dhe në mungesë të anëtarëve të Bordit shumë përgjegjësi janë bartur te shefja e ekzekutivit, e kjo nuk është absolutisht në rregull dhe kujtoj që bie ndesh me rregulloren në fuqi për funksionimin e KPM-së.

Shqetësuese është fakti se që nga themelimi, KPM-ja nuk ka arritur të vendos një rregull në tregun medial në Kosovë. Në disa raste, KPM-ja ka marrë vendime selektive. Në njërën anë, TV Mitrovicës ia merr licencën, ndërsa në anën tjetër, medimeve serbe iu lihet hapësirë dhe nuk ka kontroll mbi to. Megjithatë, përkundër të metave dhe vështirësive në KPM, këtë vit vërehet një lëvizje e ndjeshme pozitive krahasuar me vitin e kaluar, por kujtoj se KPM-ja është larg vendosjes së një rregulli medial në Kosovë. Që kjo të ndodhë, duhet të bëhet një ligj i mirë dhe funksional konform standardeve të vendeve me demokraci të përparuar.

Prandaj, Grupi Parlamentar i Aleancës për Ardhmërinë e Kosovës, me vërejtje të cilat mendoj se duhet të plotësohen dhe, duke shpresuar se do të nxirret një ligj, e përkrah këtë raport të KPM-së.

Në emër të Grupit Parlamentar të LDD-së, deputetja **Synavere Rysha** theksoj se diskutimin do ta fokusoj në dy qasje apo në dy rrafshë. E para është koha kur ne po diskutojmë për raportet në përgjithësi, mandej pjesa tjetër do të jetë ndoshta shumë e shkurtër për raportin e KPM-së.

Se a ia vlen që ky raport të diskutohet në Kuvendin e Kosovës diku 9 muaj, do me thënë pas përfundimit të vitit kalendarik, sepse ne po i diskutojmë raportet për vitin 2007 dhe jemi diku në fundin e shtatorit të vitit 2008 nuk e di sa është një qasje e drejtë apo sa Kuvendi i Kosovës po vepron drejt konform institucioneve të pavarura apo konform ligjit mbi menaxhimin e financave.

Ne vazhdim ajo tha se Ligji mbi menaxhimin e financave parasheh rregulla të veçanta, ka kohë që thuhet se raportimi duhet të bëhet diku deri më 31 mars të vitit në vijim, sepse këto raporte është dashur të shqyrtohen diku kah 31 marsi i vitit 2008. Nëse kjo nuk ndodhë, atëherë afati i fundit për të raportuar është maji i vitit 2008. Mirëpo, ne jemi në muajin shtator të vitit 2008

dhe po vazhdojmë të shqyrtojmë raportet për vitin 2007. Raportet janë, fundja, edhe si rezultat apo si matje e performancës së funksionimi të një institucioni. Prandaj, nuk di a ia vlen që në fund të vitit ne të merremi me vitin 2007, por ndoshta do të kishte qenë mirë që t'i kalojmë edhe 3 muaj dhe 2 raportet së bashku, raportin për vitin 2007 dhe raportin për vitin 2008 ta shqyrtojmë në vitin 2009, po në fillim të vitit do t'i japim rekomandimet tona. Prandaj, unë këtu shoh një papërgjegjësi apo një mosfunksionim të drejtë apo mosshqyrtim të drejtë të punëve konform këtyre raporteve në Kuvendin e Kosovës.

Sa i përket raportit të KPM-së, vërejtjet tona janë të shkurtëra, por sido që të jetë, nuk do të shtoj më tepër se sa që e tha kryetari apo edhe anëtarët e komisionit funksional sepse së bashku i kemi nxjerrë rekomandimet tona.

KPM-ja nuk ka punuar me bord të kompletuar asnjëherë. Kjo ndoshta si pasojë ka sjellë dhe si rezultat ka qenë që shpeshherë shefja ekzekutive ka ndërmarrë vendime që kanë qenë të kundërligjshme, mirëpo ajo i ka zbatuar. Rast më i freskët që është shkelur më së shumti rregullorja ka qenë ndoshta edhe rasti me Televizionin e Mitrovicës, kur në mënyrë parciale është vepruar dhe i është ndërprerë puna këtij mediumi, ndërsa për shkelje të njëjta mediumet e tjera nuk janë prekur.

Ka edhe shkelje të tjera që, vërtet, shpresojmë që në të ardhmen Bordi i KPM-së të kompletohet dhe të punohet më drejt në këtë drejtim.

Në emër të Grupit Parlamentar “7+”, deputetja **Shpresa Murati** tha se Raporti i Komisionit të pavarur për media i vitit 2007 i ngjason atij të vitit 2006. Janë vërejtur mangësitë dhe dobësitë e njëjta.

Komisioni i Pavarur për Media si Agjencion regullativ, është i obliguar të siguroj frekuencat e nevojshme për emetuesin publik në mënyrë që RTK-ja të mbulojë 90% të territorit të Kosovës.

RTK-ja nuk posedon infrastrukture për emetimin e sinjalit TV nga pika e emetimit në Golesh.

Grupi parlamentar 7+ e mbështet këtë Raport por sinqerisht beson se nuk do të open vërejtjet e njëjta edhe për Raportin e vitit 2008.

Opinione, vërejtje dhe sugjerime lidhur me Raportin vjetor të Punës së Komisionit të Pavarur për Media për vitin 2007 dhanë me diskutimet e tyre edhe deputetët **Numan Baliq, Naim Rrustemi, Gani Geci, Adem Salihaj, Riza Smaka, Shkumbin Demaliaj, Naser Rugova, Bahri Hyseni, Gani Buqinca, Berat Luzha dhe Sabri Hamiti**. Diskutimet e deputeteve janë pjese e transkriptit të kësaj seance plenare.

Në përmbyllje të debatit, Kryesuesi i seancës, z. Sabri Hamiti propozoj si rekomandim të këtij diskutimi në Kuvend që të votohet për raportin që e diskutuam dhe njeherit të votohet për një rekomandim që Ligji për Komisionin e Pavarur të Mediave të amendamentohet. Mendoj që kjo ishte kërkesa themelore që doli nga 2 grupe dhe nga disa deputetë.

Kryesuesi ftoj deputetët që ta votojnë Raportin bashkë me rekomandimin që të rishihet amneditimi i Ligjit për Komisionin e Pavarur për Media.

Në bazë të votimit, kryesuesi konstaton se “për” kanë votuar 47 deputetë, “kundër” kanë votuar 14, ndërsa 5 kanë abstenuar, andaj me shumicë votash miratohet Raporti i Komisionit të Pavarur të Mediave për vitin 2007 si dhe rekomandimi për rishikimin e amendamentimit të Ligjit për Komisionin e pavarur për Media dhe Transmetim.

3. Shqyrtimi i Raportit për shpenzimet e Buxhetit të Kosovës për gjashtëmujorin e parë të vitit 2008 (raporti iu është dërguar deputetëve më 04.08.2008),

Ne fillim te debatit lidhur me këtë pike, kryetari **Jakup Krasniqi** theksoj se:

Qeveria e Kosovës, respektivisht Ministria e Ekonomisë dhe Financave, në pajtim me Ligjin mbi menaxhimin e financave publike dhe përgjegjësitë, i ka parashtruar Kuvendit Raportin për shpenzimet e buxhetit të Kosovës për gjashtëmujorin e parë të vitit 2008.

Komisioni për buxhet dhe financa, e ka shqyrtuar Raportin për shpenzimet e buxhetit të Kosovës për gjashtëmujorin e parë të vitit 2008 dhe ka rekomanduar që të radhitet për shqyrtim në seancën plenare.

Rekomandimi i Komisionit, së bashku me Raportin për shpenzimet e buxhetit të Kosovës për gjashtëmujorin e parë të vitit 2008 iu është shpërndarë deputetëve.

Pastaj kryetari ftoj përfaqësuesin e Qeverisë, ministrin Ahmet Shala që të prezantojë Raportin për shpenzimet buxhetore për gjashtëmujorin e parë të vitit 2008.

Ministri i Ekonomisë dhe Financave, z. **Ahmet Shala** tha se mbështetur në Ligjin për menaxhimin e financave publike dhe përgjegjësi, neni 45 – ministri i Ekonomisë dhe Financave është i obliguar që brenda 30 dite prej ditës së skadimit të tremujorit, pra për çdo tre muaj, të paraqet raportin tremujor përkatësisht tjetrin gjashtëmujor dhe kështu me radhë.

Rregullorja për buxhetin e konsoliduar të Republikës së Kosovës për vitin 2008 pasqyron planifikimet buxhetore për realizimin e të hyrave dhe ndarjet e planifikuara për shpenzime gjatë një periudhe të caktuar kohore e cila faktikisht në këtë vit është viti 2008 dhe është ndarë, nëse mund të them, është aprovuar me një vonesë prej dy muaj ditësh, për shkak të njohura për juve dhe për gjithë opinionin.

Ne vazhdim ai tha se ndarjet e planifikuara buxhetore për shpenzime gjatë vitit 2008 janë në shumën prej 1.125.280.000 euro. Sa për sqarim, të nderuar deputetë, në raportin gjashtëmujor 2008 kemi paraqitur dy nivele të rregullimit të buxhetit.

Shtylla e parë, është niveli i aprovimit të buxhetit nga ana e Kuvendit të Republikës së Kosovës dhe Përfaqësuesit special të Kombeve të Bashkuara për hir të obligimeve ligjore konform Kushtetutës para 15 qershorit të vitit 2008.

Kolona e dytë, është gjendja e cila është e sistemuar në sistemin informativ për menaxhimin e financave publike e cila quhet SIMFP.

Dallimi në mes të sistemit informativ për menaxhimin e financave publike të Republikës së Kosovës dhe Rregullores së buxhetit 2008/13 rrjedh si vijon:

- Kërkesat e organizatave buxhetore për transfere deri në vlerë prej 20%;

- Të hyrat vetjake të bartura nga viti 2007 në vitin 2008 dhe grumbullimi i të hyrave vetjake gjatë vitit 2008, të cilat nuk janë planifikuar me Rregulloren 2008/13, për çka i keni tablat e bashkëngjitura raportit që e kam dorëzuar me kohë.

Gjithsej, pra, për vitin 2008 janë 1.125.280.000 sipas SIMFP-it.

Në shumën totale, të planifikimit buxhetor, është llogaritur edhe huaja e KEK-ut e cila është aprovuar në planifikimet e rregullta buxhetore prej 79,4 milion euro.

Në vazhdim, ministri paraqiti raportin e ekzekutimit të buxhetit të vitit 2008 dhe atë ne detale dhe ate së pari të hyrat e pastaj shpenzimet.

Duke përmbyllur këtë paraqitje, ministri Shala theksoj se, te dhënat për të hyrat dhe shpenzimet për gjashtëmujorin e parë të vitit 2008 reflektojnë faktin se përkundër vështirësive dhe sfidave, siç e përmenda edhe më lartë, që jemi ballafaquar si dhe përkundër faktit se gjatë kësaj periudhe Kosova ka kaluar nëpër momente historike, siç ishte shpallja e pavarësisë dhe, megjithë implikimet që i pati në veri dhe në gjithë gjendjen e tranzicionit të institucioneve të Kosovës, Qeveria e Kosovës, në bashkëpunim me qytetarët e vet dhe me të gjitha institucionet relevante vendore dhe ndërkombëtare ka arritur të realizojë caqet e veta të planifikuara dhe t'i tejkalojë në mesatare diku rreth 18% të hyrat dhe të kursej në shpenzime.

Fjala e plote e ministrit Shala është pjese e transkriptit të seancës plenare.

Kryetarin i Komisionit funksional, z. **Gani Koci** prezantoj qendrimit e Komisionit për buxhet dhe financa. Ai tha se duke u bazuar në nenin 45 të Ligjit mbi menaxhimin e financave publike dhe në Rregulloren e punës të Kuvendit, Komisioni për buxhet e financa ka shqyrtuar Raportin për shpenzimet buxhetore të këtij gjashtëmujori, dhe ka konstatuar se në aspektin teknik dhe atë formal, ky Raport i plotëson standardet mbi raportimin dhe është në nivel më të lartë sesa raporti i vitit paraprak. Mendimi i Komisionit është, që e tha edhe ministri i Ekonomisë dhe Financave, se përkrah këtë preformancë të rritjes së të hyrave 10% nga ato të planifikuara. Është konsideruar se rritja e të hyrave përveç efikasitetit të administratës, që e ka kushtëzuar një rritje të tillë, është edhe ngritja e çmimeve të shumë produkteve dhe natyrisht me këtë edhe është ngritur dogana dhe akciza, prandaj është edhe element tjetër i të rritjes së të hyrave.

U vlerësua e suksesshme puna e Qeverisë në kursime të bëra për kategoritë ekonomike në mallra dhe shërbime, pa dashur të futem në shifra, sepse ato i ceku edhe ministri më parë.

Vërejtje dhe konstatim i Komisionit janë se në shumë agjencione buxhetore vërehen projekte kapitale që janë bartë nga viti në vit dhe nuk janë realizuar as në këtë gjashtëmujor dhe është kërkesë e Komisionit që këto projekte ose vërejtjet në këto projekte të adresohen atje ku mund të shpenzohen dhe të mos kemi projektme dhe në fund të kemi suficit të projektuar sikur që është diku rreth 78 milion, sipas parashikimeve.

Po ashtu, vërejtje tjetër e Komisionit është se ka shuma të mëdha të dhënies, që quhet formë e avanceve, gjë që ka kërkuar edhe sqarime rreth këtyre çështjeve.

Një brengë tjetër është, sikur që u theksua edhe gjatë shqyrtimit në Komision të këtij raporti, ku kanë qenë prezent edhe këta të ministrisë përkatëse, sidomos për vendimet e fundit mbi faljen e ndëshkimeve, për çka, Komisioni ka menduar se është një akt dhe veprim ndoshta që kishte dashur të ndodhë më ndryshe.

Dhe, duke pasur parasysh edhe disa vërejtje tjera, Komisioni i ka rekomanduar Kuvendit dhe i rekomandon që ta miratojë këtë Raport.

Po ashtu, i rekomandohet Qeverisë që në pjesën tjetër të vitit fiskal të realizojë buxhetin konform Ligjit mbi miratimin e buxhetit të konsoliduar të Kosovës dhe shpenzimeve të autorizuar për këtë periudhë dhe të menaxhojë më mirë suficitin ose deficitin eventual të buxhetit.

I rekomandohet Qeverisë të jetë më e kujdesshme ndaj agjencioneve buxhetore të cilat kanë bërë ngecje në realizimin e buxhetit të tyre të miratuar, sidomos në realizimin e shpenzimeve kapitale.

Ne emër të Grupit Parlamentar të Partisë Demokratike, deputetja **Safete Hadërgjonaj** tha se Raportin me kujdes e kemi shqyrtuar edhe nga radhët e Grupit Parlamentar të Partisë Demokratike të Kosovës dhe gjatë shqyrtimit kemi ardhur në përfundim se ky raport gjashtëmujor i buxhetit është dukshëm më mirë i përgatitur, si në aspektin teknik ashtu edhe në atë përmbajtjesor.

Po ashtu, është mirë të thuhet se raporti na ka ardhur me kohë, sikur që është paraparë me Ligjin për menaxhimin e financave publike dhe përgjegjësi.

Ajo që është më kryesorja në këtë raport, vërehet një transparencë më e madhe sa i përket shpenzimeve kapitale.

Nga analiza e raportit vërejmë se shpenzimet janë realizuar 326.074.000 euro, apo 31.2% nga buxheti i planifikuar.

Gëzon fakti se po vijnë duke u zvogëluar shpenzimet në disa kategori të mallrave dhe shërbimeve, ku në të kaluarën është abuzuar shumë.

Në këtë vit kemi një zvogëlim të shpenzimeve të udhëtimit për 27% dhe të shpenzimeve të telekomunikacionit për 22%. Shërbimet kontraktuese janë zvogëluar për 4%, që asnjëherë më parë nuk është dhënë ndonjë sqarim se pse kjo kategori e shpenzimeve në vazhdimësi është rritur.

Ky është një sinjal se Qeveria është duke bërë përpjekje për t'u shkëputur nga shfrytëzimi jo i mirë i mjeteve në kategorinë mallrat dhe shërbimet, që në të kaluarën janë shpenzuar në mënyrë të pakontrolluar.

Shpenzimet kapitale kanë pasuar me një rritje të kënaqshme gjatë këtyre muajve edhe pse është herët të gjykohet për këto shpenzime se për këto projekte a do të shpenzohen mjetet apo nuk do të shpenzohen në të ardhmen. Këto shpenzime janë 54% më të larta krahasuar me të njëjtën periudhë të vitit të kaluar.

Nisur nga fakti se ky vit buxhetor ka filluar me vonesë për shkak të miratimit të buxhetit, shkak i zgjedhjeve, atëherë shpenzimi në këtë kategori është i kënaqshëm me vetë faktin se janë shpenzuar 58.864.000 euro dhe janë zotuar 157.956.000 euro.

Kam bindje të plotë se Qeveria është duke punuar shumë për një shpërndarje të njëtrajtshme të shpenzimeve kapitale dhe është duke punuar shumë që në të ardhmen shpenzimet kapitale të kenë një strukturë të harmonizuar të shpenzimeve buxhetore në fillim të vitit dhe do të ulët mundësia e shpenzimit të tyre gjithë herë në fund të vitit.

Të hyrat buxhetore gjatë këtyre 6 muajve të parë të këtij viti kanë dëshmuar për një angazhim serioz për vjeljen e të hyrave edhe përkundër problemeve me të cilat jemi përballuar në vazhdimësi.

Këtu është një performancë e mirë e të hyrave nga dogana, ku këto të hyra janë rritur 11% krahasuar me të njëjtën periudhë të vitit të kaluar, kurse vlen për t'u theksuar performanca e mirë në administratën tatimore të Kosovës, ku të hyrat nga administrata tatimore janë më të larta për 12% se sa që kanë qenë në vitin 2007. Të hyrat nga administrata tatimore kanë qenë 10% më të ulëta në krahasim me vitin 2006.

Të hyrat vetjake qeveritare janë rritur për 27%, kurse është shumë e mirëseardhur rritja e të hyrave vetjake të komunave për 27%, krahasuar me vitin 2007, kur dihet se në të kaluarën kemi pasur në vazhdimësi një performancë negative të të hyrave në këtë kategori.

Qeveria ka premtuar se do t'i ulë shpenzimet dhe të bëjë rritjen e të hyrave. Nga raporti, nëse e analizojmë me kujdes, vërehet se ka ulje të shpenzimeve në disa kategori ku është shfrytëzuar jo mirë buxheti në të kaluarën ku njëkohësisht ka rritje të hyrave prandaj Grupi Parlamentar i Partisë Demokratike e përkrah raportin gjashtëmujor të buxhetit.

Në emër të Grupit Parlamentar të Lidhjes Demokratike, diskutoj deputeti **Haki Shatri**, i cili ne fillim tha se Grupi Parlamentar i Lidhjes Demokratike e ka shqyrtuar dhe analizuar këtë raport dhe më ka angazhuar si person që jam profesionalisht më i lidhur me këtë lëmi të raportoje për përshtypjet tona lidhur me raportin.

Fillimisht ju them se ne e përkrahim raportin dhe, si të tillë, do ta votojmë.

Megjithatë, kjo nuk do të thotë se, nëse përkrahet raporti, nuk vërehen disa nga veprimet në realitet nëpër organizata buxhetore që nuk meritojnë të ndryshohen në të mirë, në kuptim pozitiv. Pra, që të zhvillohen në pajtim me dispozitat e Ligjit për menaxhimin e financave publike dhe përgjegjësitë.

Të hyrat. Jemi të kënaqur, jemi të lumtur që përafërsisht janë shumë afër dinamikës së paraparë me buxhetin për vitin 2008 në të gjitha kategoritë, qofshin në grumbullimin e të hyrave në kufij

nga doganat dhe TVSH në kufi qoftë nga grumbullimi i të hyrave në brendi nga ana e administratës tatimore, që do të thotë se 47 – 48% e realizimit të buxhetit në gjashtë muaj është shumë afër përqindjes së plotë kur merren parasysh se gjysma e parë e vitit buxhetor, në aspektin e të hyrave, gjithmonë është më e dobët, kurse gjysma e dytë e vitit, në aspekt të grumbullimit të të hyrave është më e dobishme, më produktive – shpresojmë se të hyrat e parapara me buxhet për këtë vit në të gjitha kategoritë do të realizohen.

Ndoshta është e kënaqshme e dhëna se të hyrat janë rritur 10%, por nëse bëjmë një analizë kualitative të të hyrave, ndoshta nuk do të mund të jemi të kënaqur vetëm me krahasimin me 10% të vitit të kaluar, sepse duhet të kemi parasysh sa është rritur importi në këta gjashtë muaj dhe të vlerësojmë se ajo dinamikë a është kompatible me rritjen e importit në këtë periudhë të vitit kur po e analizojmë dinamikën e të hyrave. Prandaj krahasimi me të kaluarën është i mirë për të parë dinamikën, por nuk e tregon realitetin e një pune në kuptimin cilësor. Megjithatë, në aspektin e vlerësimit të të hyrave, vlerësojmë se dinamika e të hyrave është e kënaqshme dhe e inkurajojmë edhe Administratën Tatimore dhe Shërbimin Doganor që të vazhdojnë në mënyrë që buxheti të plotësohet me të hyra ashtu sikur është paraparë, e pse jo edhe të tejkalohet.

Sa i përket shpenzimeve, shihet në shifra se dinamika është më e kënaqshme në numra sesa në periudhën e njëjtë të vitit të kaluar dhe kjo meriton lëvdatë. Por, në analizë strukturore kualitative mund të vërehet se nuk ka shumë ndryshime të dalluara pozitive. Pse po them kështu? Në totalin e shpenzimeve buxhetore, të cilat, krahasuar me buxhetin e këtij viti, janë vetëm 29.8%, ose 30%. Sipas periudhës kohore, do të ishte dashur të jetë afër 50%. Mirëpo, shuma e shpenzuar 30% është diçka më e kënaqshme por është tepër e ulët në krahasim me dinamikën e dëshiruar. Te komunat është diçka më e mirë – 37% për shumën e mjeteve të shpenzuara, që do të thotë bashkërisht dy nivelet bëjnë 31% të shpenzimeve për periudhën gjashtëmujore. Mirëpo, kur analizohet struktura e shpenzimeve, kemi shumë pak ndryshim kualitativ, për të mos thënë, nuk ka fare. Shuma e investimeve kapitale është realizuar vetëm 13%. Nuk e di shifrën e vitit të kaluar, por po flas për këtë vit – 13%. Nëse merret parasysh edhe fakti që nga 400.000.000 që ka pasur buxhet për investime në këtë vit, ku hyjnë edhe projektet e bartura diku rreth 36, sepse se di shifrën përmendësh, deri në 40 milion dhe në qoftë se supozojmë se investimet e bartura nga viti i kaluar kanë vazhduar në fillim të këtij viti, atëherë del se në investime e reja në projektet e këtij viti kemi përqindjen edhe më të vogël të realizimit të investimeve kapitale.

Prandaj, duhet t'i kemi parasysh këto analiza strukturore të shpenzimeve dhe të krijojmë një parafytyrim real për shpenzimet buxhetore në këtë periudhë.

Dua të them, kur jemi te pasqyrat, se janë disa defekte, për çka unë do të përpiqem në parim t'i përmend dy-tri raste, sepse diçka nuk përputhet me dokumentin e buxhetit, të aprovuar me 16 shkurt dhe me atë që na është ofruar në raport.

Për shembull, në AKM, buxheti i aprovuar ka qenë, po flas për investimet kapitale, 61.800.000 euro. Në rishikim, kemi një gjendje tjetër, sepse është ndarë, AKM-ja është shuar, dhe kemi një pjesë me Ministrinë e Financave, por e kemi në raport shumën e alokuar që nuk përputhet me atë që ka qenë në buxhetin fillestar dhe shuma që paraqitet këtu është 56.5 milion. Do të thotë për 5 milëion ndryshon. Në shtojcën a/3 shuma është krejt tjetër, sillet në 63.221.000. Po ashtu nuk përputhen shumat në Ministrinë e Posttelekomunikacionit. Buxheti është 89...

Ne emër te Grupit Parlamentar të Aleancës së Re të Kosovës diskutoj deputeti **Shkumbin Demalijaj**, i cili tha se neve sot, gjatë hartimit të rendit të ditës dhe aprovimit të tij, patëm kundërshtitë tona por na u mor e drejta e fjalës, kryesisht edhe të shefit të Grupit Parlamentar, kështu që për mundësinë e shqyrtimit të raportit gjashtëmujor të buxhetit të Kosovës, i arritur nga Ministria e Financave, përkatësisht nga Qeveria e Kosovës – jemi kundër shqyrtimit sot të këtij raporti gjashtëmujor.

Në emër të Grupit Parlamentar të Aleancës për Ardhmërinë e Kosovës, deputeti **Ardian Gjini**, i cili tha se debati për buxhetin është një ndër punët më serioze, më të rëndësishme, si për parlamentin ashtu edhe për qeveritë.

Tre herë kemi pasur biseda për buxhetin në këtë vit: kur është miratuar buxheti në fillim, kur kemi kaluar nëpër rishikim të buxhetit dhe tani që po diskutojmë për raportin për gjysmë viti të realizimit të buxhetit. Që të tre herët, Kuvendi i Kosovës ka pas problem. Që të tre herët kemi diskutuar vonë, pasdite. Që të tre herët, i kemi pas për ngutë. Dhe, ka ardhur koha me thënë që, nuk besojmë se janë realisht koincidenca tre herë. Tre herë duhet të përfundojë transmetimi që mos me dëgjuar populli se çka bisedohet për paranë publike, për shpenzim të parasë publike. Tre herë ka qenë dashur të kalojë shpejt e shpejt e të mos ketë mundësi të shoshishet çështja më e rëndësishme, për të cilën diskuton Parlamenti me Qeverinë, realisht.

Tani do të ndalem te dy çështje, të cilat kanë qenë tema shumë serioze të Qeverisë së Kosovës që prej fillimit, bile-bile edhe gjatë fushatës: Drekat dhe darkat. Bile, më kujtohet vetja mua këtu, një herë, kur iu kam thënë ministrave “hani bre se po vini të uritur”. Po më duket, më kanë kuptuar keq, sepse 12% e kanë rritur shpenzimin në krahasim me qeverinë e kaluar. Domethënë 12% më tepër janë ngrënë darka e dreka.

Shembulli tjetër është një çështje tepër serioze, për të cilën Qeveria ka folur shumë dhe ka qenë qiraja. Ka qenë një premtim i drejtpërdrejt i Kryeministrit të Kosovës që nuk do të ketë më institucione me qira, se nuk do të paguajmë më qira, se nuk do të abuzojmë kështu me paranë publike. A dini çka ka ndodhë? Edhe paret për qira, janë rritur. Domethënë, edhe qira, kjo Qeveri në gjashtë muajt e parë ka paguar më shumë se qeveria e kaluar.

Përkundër faktit se shembull ta marrim, institucionet ndërkombëtare, disa prej tyre po i lëshojnë zyrat, sepse ka domethënë tepërcë të zyrave sot, tash është e çuditshme pse është rritur qiraja. Dhe, seriozisht, kam menduar për këtë punë, a mos mund të ndodh Ministria e Punëve të Jashtme, Ministria e Forcës së Sigurisë! Jo, nuk është ashtu, se Ministria e Punëve të Jashtme nuk është me qira, është në objekt të Qeverisë. Dhe, aq më tepër, dje ministri na tha që deri në qershor unë s’kam funksionuar si Ministri. Domethënë deri në qershor s’ka funksionuar Ministria e Punëve të Jashtme, kështu që nuk ka pasur mundësi të rriten shpenzimet në qira për shkak të Ministrisë së Punëve të Jashtme. E njëjta gjë, vlen për Ministrinë e Forcës së Sigurisë së Kosovës, e cila është themeluar pak rishtazi.

Tani dikush duhet të fillojë edhe të mendojë. Qysh bën? Qysh bën, domethënë të rriten shpenzimet për qira në këtë kohë, përkundër premtimit më të qartë të mundshëm që ka mund të jep një kryeministër i një vendi. “Nuk ka më qira, kemi me i heq krejt”. “Ju keni abuzuar”, na thoshte neve atëherë.

Një element tjetër, një premtim tepër-tepër-tepër i madh është: suficiti. Nëse ju kujtohet, çka ka ndodhur në fushatën e kaluar për suficit, edhe e shihni tash se kemi suficit të programuar diku afër 70 e sa milion. Prapë duhet me menduar! More, a janë të njëjtit njerëz që i kemi dëgjuar ne përpara dhe çka po ndodhë tash! Domethënë, pse ka kaq shumë suficit. Pse ka kaq shumë suficit kur ka edhe vrapim të tmerrshëm për me shpenzuar mjete pa menduar se ku po shkojnë. Vetëm të shpenzohet buxheti! Çkadoqoftë të ndërtohet, me hapë tendera, me hapë tendera dhe me i shpenzuar dhe prapë nuk munden, iu dalin diku nja 70 milion suficit.

Secili prej nesh kemi dëshirë me pa përparim në komuna, me pa rregull në buxhet, me pa rritje të hyrave vetjake të komunave. Kjo është mirë për Kosovën dhe ka ndodhur, është e vërtetë. Mirëpo, vetëm sa për kënaqësi të deputetëve dhe të popullit, ministri ka qenë dashur të na përmend në cilat komuna ka qenë rritja më e madhe në inkasimin e të hyrave vetjake dhe në cilat komuna më të vogla dhe pse. A ka faj komuna, a ka faj Qeveria ose, a është meritë e komunës, për ta shndërruar në pozitive këtë çështjen e fajit – a është meritë e komunës a është meritë e Qeverisë qendrore dhe pse ka ndodhur ashtu. Pse ka ndodhur shembull ta marrim që në Pejë dhe në Gjakovë është rritja më e madhe e të hyrave vetjake. Diku tjetër, mos të kuptohem ndryshe, është më e vogla.

Ministri duhet të jetë transparent, duhet të vjen me kohë, seancat duhet të mbahen kur e dëgjon publiku, se janë për publik, janë parat e publikut dhe ministri nuk duhet ta bëjë Kuvendin që ta presë ministrin. Nuk ka mbledhje më të rëndësishme se seanca plenare e Kuvendit për asnjë ministër. Ministri duhet t'i dijë, edhe pse vetë nuk është i zgjedhur, që seanca plenare e Kuvendit është mbledhja më e rëndësishme për këdo qoftë. Nuk ka mbledhje më të rëndësishme. Dhe, ka qenë e paraparë shumë më përpara. Domethënë, ministri nuk është befasuar. Në fakt, neve ministri na e ka caktuar agjendën. Vetë e ka caktuar ditën dhe kur ne duhet të diskutojmë, ministri nuk është këtu sepse ka mbledhje më të rëndësishme.

Nuk janë të mira këto për demokracinë, nuk janë të mira për ne, nuk janë të mira për vendin. Unë kërkoj prej jush t'i merrni parasysh qofshi edhe në pozitë, qofshi edhe në pushtet – merrni parasysh këto çështje, se nuk po i bëjnë mirë vendit.

Ne emër të Grupit Parlamentar të Lidhjes Demokratike të Dardanisë diskutoj deputetja **Besa Gaxherri**, e cila ne fillim tha se askund në botë, në asnjë vend të botës demokratike, kuvendit nuk ia cakton agjendën qeveria por ndodhë e kundërta.

Sot, hiç ma larg, ne kemi pasur këtë pikë të parën të rendit të ditës. Kjo pikë e rendit të ditës është shtyrë për në orën 14,30 dhe kemi filluar diku në 15,10 – a 15,15. Kjo të jep të kuptosh se vërtetë Qeveria e cakton agjendën në Kuvend, Qeveria e luan rolin tamam të një monarku. Kuvendi, si organi më i lartë i këtij shteti nuk respektohet dhe po them shumë sinqerisht kjo nuk është shenjë e mirë. Kjo nuk i kontribuon demokracisë, nuk i kontribuon as respektimit të ligjit, as Rregullores së Kuvendit të Kosovës.

Megjithatë, unë dua të ndalem në pika shumë të shkurtra ose në vija të trasha për këtë raport.

Dua të ndalem vetëm në të hyrat dhe shpenzimet për këta gjashtë muaj. Në bazë të këtij raporti, shohim se të hyrat gjashtëmujore të vitit 2008 janë në shumën prej 408.260.000 (katërqind e gjashtë milionëve, pikë 26 milion euro), ose 47.7% dhe pagesat, të dalurat e realizuara në gjashtëmujorin 2008 kanë arritur shumën prej 326.072.000 që paraqet diku 31.2%, domethënë nuk e ka mbërritur as 50%.

Kur diskutohet për të hyrat dhe shpenzimet e buxhetit, secili ministër duhet të jetë këtu, në krye me shefin e vet. Këtu vjen vetëm kush ka kohë, kujt i del kohë vjen e kujt s'i del, ka punë më të mençme.

Domethënë, këtu mua më befason kyfarë planifikimi i të hyrave buxhetore tuaja. Ju këtu paraqitni se në këto të hyra afër 50% e keni realizuar planin. Çudi, po të kishte mos ndodhur ajo në doganë që 500 mijë euro në ditë ka humbje buxheti i Kosovës, ju do ta kishit 200-fishuar, a – të hyrat e Kosovës. S'keni ditur t'i planifikoni. Ose, i keni planifikuar që vërtetë doni t'i mbyllni pikat doganore atje dhe ne do t'i humbim milionat, sikur që i kemi humbur që prej shkurtit dhe megjithatë, ne kemi arritur 47% planin e të hyrave.

Tash, nga i kemi këto të hyra? Janë nga doganat, nga administrata tatimore. Ne dimë se mbi 200 milion borxhe kanë bizneset – administrata tatimore. Dhe, zoti ministër, na kemi dëgjuar si Kuvend i Kosovës përmes mediave se Qeveria ka vendos t'i falë gjobat të gjitha bizneseve që kanë borxhe ndaj buxhetit të shtetit apo të këtij shteti. Por, një gjë e tillë nuk guxon ta bëjë Qeveria, të merr vendim Qeveria, sepse është ligji dhe në ligj decidivisht theksohet edhe gjoba qysh merret, ku merret. Kjo çështje ishte dashur të shtrohet në Kuvend. Ndoshta do të kishit gjetur arsyen me na bind që vërtetë duhet t'ua falim gjobat këtyre bizneseve, por të merrni vendim mbi Kuvendin, mbi ligjin, si Qeveri, kjo nuk është e pranueshme.

Dhe kalojmë pastaj tek shpenzimet, për të cilat do të mundohem të flas diçka në vija të trasha. Kjo Qeveri, realisht edhe me rekomandimet e Fondit Monetar Ndërkombëtar, thotë se nuk guxon të rritet numri i punëtorëve – të punësuarve. Dhe, në bazë të këtij raporti, ju e keni rritur numrin diku për nja 300-400 punëtorë. Duhet normal të rritet se normal i keni ata që iu keni premtuar, të partive, me i shti në punë, duhet me i shti. Mirëpo, nuk i kontribuon kjo buxhetit të Kosovës.

Dhe kur shohim këtu, tek rrogat dhe pagat, vetëm në dalje tash, ne shohim se 6% ka ngritje të pagesës së rrogave dhe pagave. Shkurt për të mos u lidhur në shifra.

Kalojmë te mallrat dhe shërbimet. Këtu ne shohim se ju keni ngritje në mallra dhe shërbime për 2%, pa humbur kohë shumë, sepse e kemi përshkrimin këtu dhe me bë me i hy edhe përshkrimit, pastaj shohim se vërtet nuk i keni mbajt fjalët.

Shpenzimet komunale, nuk po ndalem shumë. Po ndalem pak te subvencionet dhe transferet. 30% i keni rritjet në subvencione dhe transfere. Dhe, është për çudi, që diku, për shembull ku i keni zbritur dhe ku i keni rritur kjo është e papranueshme.

Me shpenzimet kapitale, që, do të keni suficit dhe sipas kësaj, ky është vetëm një vazhdim e ish- qeverisë. Do të thotë keni suficit edhe në investimet kapitale dhe ju nuk keni parashikuar që i keni 150% ngritje, për shembull, të blerjes së veturave në krahasim me vitin 2007 dhe ua kanë rritur këto investimet kapitale, por nuk jeni gati ta përmbyllni me 50%. Faleminderit!

Ne emër te Grupit Parlamentar 7+ diskutoj **Muferra Shinik**, e cila ne diskutimin e saj mbështeti Raportin e Qeverisë për shpenzimet buxhetore për gjashtëmujorin e parë të vitit 2008.

Opinionet, vërejtje dhe sugjerime lidhur me Raportin për shpenzimet buxhetore për gjashtëmujorin e parë të vitit 2008 dhanë me diskutimet e tyre edhe deputetët **Gjylnaze Sylaj, Ismet Beqiri, Naim Maloku, Fatmir Rexhepi, Xhevdet Neziraj, Bahri Hyseni, Berim Ramosaj, Driton Tali, Ramadan Avdiu, Gani Geci, Myrvete Pantina dhe Sabri Hamiti**. Diskutimet e plota të tyre janë pjesë përbërëse e transkriptit të seancës plenare.

Sqarime plotësuese lidhur me vërejtjet e deputetëve dhe ministri i ekonomisë dhe financave, z. Ahmet Shala.

Ne përmbyllje të debatit, kryetari konstaton se në mungesë të kuorumit votimi për miratim të këtij Raporti mbetet për seancën e ardhshme.

Kryetari e deklaroi të mbyllur seancën në orën 17:20 minuta.

Kryetari i Kuvendit
Jakup KRASNIQI

Përgatiti:

Divizioni i Çështjeve Plenare dhe Procedurale